

Davlat statistika qo'mitasi huzuridagi jamoatchilik kengashi
faoliyati samaradorligini reyting baholash
METODIKASI

Mazkur Metodika Davlat statistika qo'mitasi huzuridagi jamoatchilik kengashi (bundan buyon matnda – jamoatchilik kengashi deb yuritiladi) faoliyati samaradorligini reyting baholash tartibini belgilaydi.

1-bob. Umumiy qoidalar

1. Davlat statistika qo'mitasi huzuridagi jamoatchilik kengashi faoliyati samaradorligini reyting baholash metodikasi (bundan buyon matnda – Metodika deb yuritiladi) tavsiyaviy xususiyatga ega bo'lib, jamoatchilik kengashi tomonidan amalga oshirilayotgan ishlar samaradorligini o'zini o'zi baholash usuli orqali aniqlash va erishilgan samaradorlik ko'rsatkichlari bo'yicha keng jamoatchilikning xolisona bahosini olish maqsadida ishlab chiqilgan.

2. Jamoatchilik kengashining faoliyati yilda ikki marotaba mazkur Metodikada belgilangan samaradorlikni reyting baholashning asosiy ko'rsatkichlari asosida baholab boriladi.

3. Jamoatchilik kengashining samaradorlik bo'yicha reytingini shakllantirish ushbu kengash faoliyatining ayrim jihatlarini (miqdor va sifat ko'rsatkichlarini) muayyan mezonlarga ko'ra har tomonlama tahlil qilish va baholash orqali amalga oshiriladi.

4. Jamoatchilik kengashi faoliyati samaradorligini reyting baholash jarayoni quyidagi tamoyillarga asoslanadi:

- ochiqlik va shaffoflik;
- qulaylik (baholash onlayn va offlayn shaklda ham tashkil etiladi);
- kamsitishga yo'l qo'ymaslik;
- keng qamrovlilik (jamiyatning barcha toifadagi a'zolari ishtiroki);
- hisobdorlik.

2-bob. Reyting baholashning maqsad va vazifalari

5. Metodika quyidagi maqsadlarni qamrab oladi:

1) jamoatchilik kengashi faoliyatini takomillashtirish, unga faol va tizimli tus berish;

2) jamoatchilik kengashi faoliyati samaradorligini o'z-o'zini baholash vositasi yordamida amalga oshirish;

3) jamoatchilik nazoratini amalga oshirishning oshkoraligi va ochiqligini ta'minlash, jamoatchilik kengashi faoliyatiga fuqarolar tomonidan xolis baho berish imkoniyatini yaratish;

4) jamoatchilik nazorati subyektlari, davlat hokimiyati va mahalliy o'zini-o'zi boshqarish organlari, ommaviy axborot vositalari o'rtasidagi axborot hamkorligini takomillashtirish.

6. Quyidagilar Davlat statistika qo'mitasi huzuridagi jamoatchilik kengashi faoliyati samaradorligini reyting baholashning asosiy vazifalari hisoblanadi:

- *Davlat statistika qo'mitasi faoliyati ustidan jamoatchilik nazoratini amalga oshirish va faoliyatning asosiy yo'nalishlari yuzasidan jamoatchilik ekspertizasini o'tkazish bo'yicha jamoatchilik kengashining rolini oshirish;*
- *faoliyatning ayrim sohalarida davlat siyosatini ishlab chiqishda tarmoqlararo va idoralararo o'zaro hamkorlikni kuchaytirish;*
- *jamoatchilik kengashi faoliyatining samaradorligini baholashni o'z-o'zini nazorat qilish orqali amalga oshirish;*
- *jamoatchilik kengashi faoliyatiga keng jamoatchilik va ommaviy axborot vositalarining e'tiborini jalb qilish.*

3-bob. Davlat statistika qo'mitasi huzuridagi jamoatchilik kengashi faoliyati samaradorligini reytingini shakllantirish ishlarini tashkil etish

7. Jamoatchilik kengashi faoliyati samaradorligini reyting baholash ishlarini tashkil etish har yili iyun va dekabr oylarining 10- sanasiga qadar Davlat statistika qo'mitasi raisining buyrug'i asosida jamoatchilik kengashi faoliyatini reyting baholash bo'yicha komissiya (bundan buyon – komissiya) tuzish orqali amalga oshiriladi. Komissiya tarkibiga kelishuv asosida vakolatli organ vakillari, nodavlat notijorat tashkilotlar hamda ommaviy-axborot vakillari kiritilishi mumkin.

Bunda vakolatli organ vakillari kommissiya tarkibining uchdan bir qismini tashkil etishi hamda kommissiya a'zolari ro'yxati mazkur tashkilotning rasmiy veb-saytida oldindan e'lon qilinishi lozim.

8. Kommissiya tomonidan jamoatchilik kengashi faoliyati samaradorligini baholash reytingi bo'yicha yakuniy natijalar asoslantiruvchi hujjatlari bilan birgalikda baholash ishlari o'tkazilayotgan oyning 25- sanasiga qadar Davlat statistika qo'mitasi raisi hamda jamoatchilikka taqdim etilishi lozim.

Bunda ma'lumotlarning kommissiyaga belgilangan muddatdan kechikmay, sifatli va to'g'ri taqdim etilishi uchun kengash a'zolari hamda Davlat statistika qo'mitasi raisi mas'ul hisoblanadi.

9. Jamoatchilik kengashi faoliyati samaradorligi reytingini aniqlashga oid ma'lumotlar va ularning asoslantiruvchi hujjatlari kommissiya tomonidan qo'shimcha o'rganilishi mumkin.

Asoslantiruvchi hujjatlari mavjud bo'lmagan, shuningdek, haqiqatga to'g'ri kelmaydigan yoki asossiz ma'lumotlar reytingni hisoblashda inobatga olinmaydi.

4-bob. Metodikasi qo'llash shartlari

10. Jamoatchilik kengashi faoliyati samaradorligini reyting baholash mezonlari qonunchilik hujjatlari bilan jamoatchilik kengashiga yuklatilgan vazifa va funksiyalarga asoslanadi.

11. Jamoatchilik kengashi faoliyati samaradorligi reyting bahosi quyidagi manbalar asosida shakllantiriladi:

- jamoatchilik kengashining faoliyati to'g'risidagi hisobotlar;
- jamoat birlashmalari va boshqa nodavlat notijorat tashkilotlarning bergan bahosi, taklif va mulohazalari.

12. Jamoatchilik kengashi faoliyati samaradorligini reyting baholash bo'yicha miqdor va sifat ko'rsatkichlarini hisoblash tartibi ushbu Metodika ilovasida belgilangan mezonlarga muvofiq amalga oshiriladi.

13. Jamoatchilik kengashining mazkur Metodikasiga Davlat statistikasi raisi roziligi bilan o'zgartirish va qo'shimchalar kiritilishi mumkin.

14. Komissiya tomonidan jamoatchilik kengashi faoliyati samaradorligini reyting baholash bo'yicha olingan yakuniy natijalar jamoatchilik kengashiga ma'lumotnoma ko'rishida, Davlat statistika qo'mitasi raisiga esa tahliliy ma'lumotnoma shaklida taqdim etiladi.

15. Jamoatchilik kengashi tomonidan jamoatchilik kengashi faoliyati samaradorligini reyting baholash natijalari har olti oyda Davlat statistika qo'mitasi rasmiy veb-saytida joylashtiriladi hamda reyting natijalari haqida jamoatchilikka ma'lumot beriladi.

5-bob. Jamoatchilik kengashi faoliyati samaradorligi reyting ballarini hisoblash tartibi

16. Reytingni hisoblash Metodika ilovasida keltirilgan baholash mezonlari asosida matematik metodlar orqali har bir ko'rsatkich bo'yicha alohida hisoblanadi.

17. Komissiya a'zolari reyting baholash natijalari bo'yicha xulosa berganda qonunchilik hujjatlarida nazarda tutilgan quyidagi umumiy talablarni inobatga olishi zarur:

1. Jamoatchilik kengashi faoliyatidan aholining manfaatdorligi, fuqarolar bilan jamoatchilik kengashi o'rtasida o'zaro samarali hamkorlikni yo'lga qo'yilganligi.

Bunda komissiya a'zolari tomonidan jamoatchilik kengashining fuqarolar, nodavlat notijorat tashkilotlar hamda fuqarolik jamiyatining boshqa institutlari bilan o'zaro aloqalari, axborot resurslari, rasmiy veb-saytlar yoki ijtimoiy tarmoqlarda jamoatchilik kengashi faoliyatiga oid chop etilgan muayyan mavzulardagi materiallar, ularning ijtimoiy tarmoqlar va axborot platformalarida foydalanish uchun joylashtirilganlik holatlarini monitoring qilish orqali xulosa qilinadi.

2. Jamoatchilik kengashi tomonidan jamoatchilik muhokamasi paytida berilgan takliflarning rasmiy qarorlarda yoki qabul qilingan me'yoriy hujjatlarda inobatga olinganligi.

Ushbu ko'rsatkich jamoatchilik kengashi tomonidan bildirilgan izoh va takliflarga mos keladigan o'zgarishlarni qarorlarning yakuniy versiyasini (rasmiy hujjatlar) taqqoslash orqali aniqlanadi;

3. Jamoatchilik kengashini tashkil etgan vakolatli organ faoliyati jamoatchilik kengashlari tomonidan ko'tarilgan masalalar orqali yaxshilanganligi holati (jamoatchilik nazorati yoki jamoatchilik ekspertizasi orqali).

Ushbu ko'rsatkich bo'yicha vakolatli organ faoliyati va qonunchilik hujjatlariga o'zgartirish va qo'shimcha kiritish bo'yicha jamoatchilik kengashi tomonidan berilgan tashabbuslar ko'rib chiqiladi.

18. Metodika ilovasida keltirilgan baholash mezonlari asosida har bir ko'rsatkich yuzasidan to'plangan umumiy ballardan quyidagicha reyting shakllantiriladi:

- 60 ball va undan yuqori bo'lganda – a'lo;
- 40 ball dan 59 ballgacha bo'lganda – yaxshi;
- 21 ball dan 39 ballgacha bo'lganda – qoniqarli;
- 20 dan kam ball bo'lganda – qoniqarsiz.

19. Reyting baholash natijalari Komissiya yig'ilishida bayonnoma bilan rasmiylashtiriladi. Bunda komissiya majlisi bayonnomasini rasmiylashtirish komissiya kotibi tomonidan amalga oshiriladi.

20. Komissiya yig'ilishi bayonnomasi shu vaqtning o'zida komissiyaning har bir a'zosi tomonidan imzolanadi hamda tasdiqlash uchun komissiya raisiga taqdim etiladi.

21. Komissiya kotibi komissiya raisi tomonidan tasdiqlangan bayonnoma bilan barcha mas'ul xodimlarni shu kunning o'zida tanishtirishi shart.

6-bob. Yakuniy qoidalar

22. Reyting natijalariga oid ma'lumotlar jamoatchilik kengashi ishchi organida uch yil davomida saqlanadi.

23. Mazkur Metodika O'zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligi hamda Adliya vazirligi tavsiyalariga asosan ishlab chiqilgan.

**Jamoatchilik kengashi faoliyati samaradorligini reyting
baholashga oid asosiy ko'rsatkichlarni hisoblash tartibi**

T/r	Me'zon va ko'rsatkichlar	Baholash mezonlari		
		Ko'rsatkichlarning bajarilish holati (__ yarim yillik bo'yicha)	Yakuniy natija	
I. O'zbekiston Respublikasi Prezidentining 2018- yil 4- iyuldagi "Davlat organlari huzurida jamoatchilik kengashi faoliyatini tashkil etish chora-tadbirlari to'g'risida"gi PQ-3837-son qaroriga muvofiq jamoatchilik kengashi faoliyatini tashkil etish holati bo'yicha				
1.	Jamoatchilik kengashi faoliyatini qo'mita raisi qarori bilan tasdiqlangan namunaviy Nizomga muvofiq tashkil etish	namunaviy Nizom ishlab chiqilgan	"2" ball	qoniqarli
		ishlab chiqilmagan	"0" ball	qoniqarsiz
2.	Jamoatchilik kengashi tarkibiga Davlat statistika qo'mitasida namunali xizmat qilgan mehnat faxriylari, jamoatchilik faoliyatida katta amaliy tajribaga ega nufuzli fuqarolar, shuningdek, nodavlat notijorat tashkilotlar, ommaviy axborot vositalari va boshqa fuqarolik jamiyati institutlaridan vakillarni kiritish	jamoatchilik kengashi tarkibida shunday vakillar mavjud	"4" ball	yaxshi
		jamoatchilik kengashida bunday vakillar yo'q	"0" ball	qoniqarli
3.	Jamoatchilik kengashi tarkibi to'g'risidagi ma'lumotlarni Davlat statistika qo'mitasi rasmiy veb-saytida e'lon qilish	Davlat statistika qo'mitasining rasmiy veb-saytida e'lon qilingan	"1" ball	qoniqarli
		e'lon qilinmagan	"0" ball	qoniqarsiz
4.	Jamoatchilik kengashi faoliyatida ishchi (ekspert) guruhlar tashkil etish va tajribali mutaxassislarni jalb qilish	ishchi (ekspert) guruhlar tashkil etilgan	"1" ball	qoniqarli
		ishchi (ekspert) guruhlar tashkil etilmagan	"0" ball	qoniqarsiz
5.	Jamoatchilik Kengashining yillik tasdiqlanadigan ish rejalarining mavjudligi	ish reja shakllantirilgan	"1" ball	qoniqarli
		ish reja shakllantirilmagan	"0" ball	qoniqarsiz

II. Jamoatchilik kengashi yig'ilishlarining soni va shakli				
1.	Jamoatchilik kengashini tashkil etgan Davlat statistika qo'mitasi faoliyatini o'rganish va uni yaxshilash borasida takliflar ishlab chiqish bo'yicha jamoatchilik kengashi majlislarini tashkil etish (hisobot davri bo'yicha)	Majlislar tashkil etilgan, Davlat statistika qo'mitasiga takliflar taqdim etilgan	"5" ball	yaxshi
		Majlislar tashkil etilgan, takliflar taqdim etilmagan	"2" ball	qoniqarli
		Majlislar tashkil etilmagan, takliflar mavjud emas	"0" ball	qoniqarsiz
2.	Davlat organlari faoliyatining ochiq, shaffof ishlashi, amaldorlarning xalq oldida hisobdorligi, davlat tashkilotlarida budjetning oqilona sarflanishining samarali mexanizmlarini yo'lga qo'yish istiqbollari bo'yicha fuqarolik jamiyati institutlari bilan turli xil tadbirlar tashkil etish (ilmiy- nazariy, ilmiy-amaliy konferensiyalar, "davra suhbat", seminarlar va b.)	jamoatchilik kengashi tomonidan ilmiy-nazariy va ilmiy-amaliy konferensiyalar o'tkazilgan	"3" ball	qoniqarli
		jamoatchilik kengashi tomonidan "davra suhbat" va seminarlar o'tkazish	"1" ball	qoniqarli
3.	Jamoatchilik kengashi tomonidan nufuzli xalqaro tashkilotlar, shuningdek, xorijiy davlatlar fuqarolik jamiyati institutlari bilan hamkorlikda faoliyatni yaxshilash, bu borada xorij tajribasini o'rganish yuzasidan tadbirlar o'tkazish (bevosita yoki onlayn tarzda)	tadbir o'tkazilgan	"2" ball	qoniqarli
		tadbir o'tkazilmagan	"0" ball	qoniqarsiz
4.	Ijtimoiy sheriklikni amalga oshirish bilan bog'liq masalalarni ko'rib chiqish bo'yicha jamoatchilik kengashi tashabbusi bilan tashkil etilgan tadbirlar	tadbir o'tkazilgan	"2" ball	qoniqarli
		tadbir o'tkazilmagan	"0" ball	qoniqarsiz
5.	Davlat dasturlari, ijtimoiy sohalar va hududlarni rivojlantirish bo'yicha qabul qilingan qarorlar ijrosi bo'yicha Davlat statistika qo'mitasi tomonidan amalga oshirilgan ishlar yuzasidan jamoatchilik nazoratini olib borish	jamoatchilik nazorati o'tkazilgan	"3" ball	qoniqarli
		jamoatchilik nazorati o'tkazilmagan	"0" ball	qoniqarsiz

III. Davlat hokimiyati organlarining o'z faoliyatini innovatsion yondashuvlar asosida yo'lga qo'yishi, o'z yo'nalishlarida dastur va rejalarni ishlab chiqishi, shuningdek, ularni amalga oshirish jarayonlarida jamoatchilik kengashi ishtiroki				
1.	Davlat statistika qo'mitasining o'z ish rejalari (strategiyalar, davlat dasturlari asosida)	xabardor qilingan	"2" ball	qoniqarli
	Tayyorlangan "Yo'l xaritasi" to'g'risida jamoatchilik kengashini xabardor qilishi	xabardor qilinmagan	"0" ball	qoniqarsiz
2.	Davlat statistika qo'mitasi tarkibiy bo'linmalari tomonidan jamoatchilik kengashini o'z rejalari va faoliyati to'g'risida doimiy xabardor qilib borishi	xabardor qilingan	"2" ball	qoniqarli
		xabardor qilinmagan	"0" ball	qoniqarsiz
3.	Jamoatchilik kengashining ularni tashkil etgan Davlat statistika qo'mitasining muhim masalalarda o'tkazilgan yig'ilishlarida ishtirok etishi	ishtirok etgan	"1" ball	qoniqarli
		ishtirok etmagan	"0" ball	qoniqarsiz
4.	Jamoatchilik kengashining rahbari yoki a'zolarining Davlat statistika qo'mitasi huzuridagi doimiy kollegial organga kiritilganligi	kiritilgan	"1" ball	qoniqarli
		kiritilmagan	"0" ball	qoniqarsiz
IV. Jamoatchilik kengashi yig'ilishlarida ko'rilgan masalalarning dolzarbligi va ahamiyati				
1.	Yig'ilishlarda ko'rib chiqilayotgan masalalarning ommaviy ahamiyati, bugungi kundagi dolzarbligini baholash	dolzarb	"2" ball	qoniqarli
		dolzarb emas	"0" ball	qoniqarsiz
2.	Jamoatchilik kengashi tomonidan amalga oshirilgan ishlarning qonun hujjatlari bilan ular zimmasiga yuklatilgan vazifa va funksiyalarga muvofiqlik holatini o'rganish	muvofiq	"1" ball	qoniqarli
		muvofiq emas	"0" ball	qoniqarsiz
3.	Yig'ilishlarda ko'tarilgan muammolar bo'yicha takliflar ishlab chiqish	takliflar berilgan	"1" ball	qoniqarli
		Takliflar berilmagan	"0" ball	qoniqarsiz
V. Jamoatchilik kengashining ochiqlik va oshkoralik tamoyillariga rioya qilishi, faoliyatining natijalari bo'yicha jamoatchilikka hisobot berib borishi				
1.	Jamoatchilik kengashi faoliyati haqida respublika, viloyat telekanallarida chiqishlar qilish	ishtirok etilgan	"1" ball	qoniqarli
		ishtirok etilmagan	"0" ball	qoniqarsiz
2.	Jamoatchilik kengashi faoliyati haqida respublika, viloyat miqyosidagi radio kanallarida chiqishlar qilish	ishtirok etilgan	"1" ball	qoniqarli
		ishtirok etilmagan	"0" ball	qoniqarsiz
3.	Jamoatchilik kengashi faoliyati haqida respublika, viloyat miqyosidagi nashrlarda materiallar chiqarish	chop etilgan	"1" ball	qoniqarli
		chop etilmagan	"0" ball	qoniqarsiz
4.	Davlat statistika qo'mitasi saytida jamoatchilik kengashi faoliyatini yoritib borish	ma'lumotlar joylashtirilgan	"1" ball	qoniqarli
		ma'lumotlar joylashtirilmagan	"0" ball	qoniqarsiz